

CUSSEGL GROND

Sessiun da zercladur 2023

Incumbensa Gartmann-Albin concernent la creaziun d'in post spezialisà sco er d'in center da cumpetenza per disturbis dal spectrum autistic (DSA)

Disturbis dal spectrum autistic (DSA) cumparan en differents secturs da la vita. Tut tenor il grad da grevezza e la vegliadetgna è lur apparientscha diversa. Persunas cun in DSA han tscherts tratgs cuminaivels. Uschia mussan persunas pertutgadas singularitads en la communicaziun ed en l'interacziun sociala. Savens han ellas stretgs interess e prefereschon andaments ch'èn adina ils medems.

Ils 17 d'october 2018 ha il Cussegl federal deliberà in rapport davart il tema DSA. En quest rapport ha el recumandà tranter auter da render l'intervenziun tempriva ina prioritad per agir en connex cun mesiras per persunas cun in disturbi dal spectrum autistic. Ina diagnosa uschè tempriva sco pussaivel è centrala ed ina intervenziun tempriva intensiva stuess cumenzar uschespert sco pussaivel suenter la diagnosa. Numerus studis scientifics han confermà l'efficacitad da las metodos per l'intervenziun tempriva intensiva.

En Svizra existan dapi intgins onns centers che porschan differents programs d'intervenziun tempriva intensiva. En il studi pertutgant l'emprova da pilot da la AI han quasi 60 pertschient dad 86 uffants promovids là pudì frequentar ina scola regulara suenter las intervenziuns temprivas intensivas.

En ils centers da cumpetenza da scola speziala sa lascha constatar in grond augment d'uffants cun in DSA al cumenzament da la prescolina/scolina. En il Grischun n'èsi dentant gia oz betg pussaivel da porscher la schanza d'ina piazza e pia ina intervenziun tempriva intensiva a tut ils uffants. Per cumbatter uschè svelt sco pussaivel cunter quest stadi dovri in post spezialisà «Autissem» en il chantun, che s'occupa da la purschidas da perfecziunament e da furmaziun supplementara da las persunas spezialisadas sco er da la cussegliaziun, da l'accumpagnament e dal sustegn complessiv da las persunas pertutgadas e da lur ambient.

Ina mancanza da piazza na regia dentant betg mo per ils uffants pitschens, mabain er per uffants, per giuvenils e per persunas creschidas cun fitg grevas furmas dal disturbi dal spectrum autistic. Las instituziuns ch'existan oz en il chantun Grischun, n'han ni il manaschi, ni il persunal ed er betg l'infrastructura per pudair dumagnar questas grevas furmas. Per cumbatter cunter questa mancanza èsi – a l'avis da las sutsegnadras e dals sutsegnaders – necessari da crear in agen center da cumpetenza cun persunas spezialisadas per DSA e cun localitads adattadas.

En quest senn incumbenseschan las sutsegnadras ed ils sutsegnaders la Regenza da crear uschè svelt sco pussaivel in post spezialisà per DSA sco er da s'occupar da la planisaziun d'in center da cumpetenza per DSA.

Claustra, ils 15 da zercladur 2023

Gartmann-Albin, Loepfe, Holzinger-Loretz, Altmann, Atanes, Bachmann, Bardill, Baselgia, Bavier, Beeli, Berweger, Biert, Bischof, Bisculm Jörg, Bleuler-Jenny, Cahenzli-Philipp (Vaz Sut), Cola Casaulta, Degiacomi, Dietrich, Gredig, Hoch, Hofmann, Hohl, Jochum, Kaiser, Kappeler, Kienz, Kocher, Kreiliger, Lehner, Loi, Luzio, Mani, Mazzetta, Michael (Castasegna), Morf, Müller, Natter, Perl, Peter, Pfäffli, Preisig, Rageth, Rettich, Righetti, Roffler, Rusch Nigg, Rutishauser, Said Bucher, Thür-Suter, von Tscharnier, Widmer, Wieland, Wilhelm, Zanetti (Sent)